

INUIT ATAQATIGIIT INATSISARTUNI



UPA 2024/118

02.05.24.

Peter Olsen

Eqqumiitsuliortut eqqumiitsuliornikkut suliaqartillutik akissarsiaasa B-Indkomstitut tigusinnaalersillugit periarfissaqalernissaat pillugu Naalakkersuisut peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasorta q Aqqalu C Jerimiassen, Atassut)

Oqaaseqaat:

Naluneqanngitsutut ukiuni kingullerni eqqumiitsuliortortatta ulluinnarni oqinnnerusunik atugassaqalernissaannik Inuit Ataqatigiit suaartaateqarlutalu suliniuteqartuartarsimavugut.

Eqqumiitsuliortortatta ulluinnarni atugassaqartinneqarnerannut tunngatillugu peqataatinneqarnerulerlutillu akisussaaqataanerulernissaannik suaartaateqartuartarsimalluta.

Assersuutigiinnarsinnaavarput eqqumiitsuliornermik aningaasaateqarfiup pilersinneqarnera.

Aningaasaateqarfiup pilersinneqarneratigut eqqumiitsuliortut eqqumiitsuliornermut aningaasaateqarfimmi akisussaaqataalerlutillu aqutseqataalersinneqarnikuupput.

Taassuma saniatigut....

Eqqumiitsuliortut akileraartarnikkut oqilisaaffigineqarsinnaanerannut tunngatillugu § 37 naapertorlugu apeqquteqaatit arlallit nassiuttarnikuullutigit, takukkit ilaatigut 2017-mi apeqquteqaatit normulerneqarsimasut 171 aamma 174, minnerunngitsumillu 2020-mi apeqquteqaat nr. 004.

Minnerunngitsumillu eqqumiitsuliornermik suliaqartut atugaannik qanoq ililluta oqilisaassisinnaanerput pillugu apeqquteqaat aallaavigalugu oqallinnissamik siunnersuuteqartarsimalluta.

Eqqumiitsuliortortatta inatsisartutigit, akileraatarnikkut aqqissuusseqqiffigineqarnissaa anguniarlugu siunnersuuteqarnissatsinnut pisariaqartittarsimavarput aningaasatigut kingunerisinnaasanik paasisaqarnissarput.

Allannguissaguttami, allannguutissatullu siunnersuuteqassagutta taava aningaasatigut qanoq kinguneqarnissaata ilisimanissaa pingaaruteqarmat aamma tamanna oqaluuserisassanngortitsiniarnermi piumasaqataasunut ilaammat.

§ 37 naapertorlugu apeqquteqaateqarsimagaluarput, aningaasatigut kingunerisinnaasai paasisaqarfigiumallugit.

Ajoraluartumilli paaserusutagut akissutissarsisinnaasimangilagut. Tamatumalu ajoraluartumik kingunerisarsimavaa allannguutissamik siunnersuusiorsinnaasimanginnerput, naak siunnersuuteqarusungaaraluaqaluta.

Taamaattumik inatsisartunut ilaasorta q Aqqalu C Jeremiassen eqqumiitsuliortut eqqumiitsuliornikkut suliaqartillutik akileraartarnerup tungaatigut nutaamik aaqqissusseqqittoqarnissaanik siunnersuuteqarmat Inuit Ataqtigiinniit nuannaajallallutalu kisianni aamma tupaallaateqalaarpugut.

Tupaallaatigaarput pissutigalugu Aqqalu C Jeremiassenip siunnersuutaani aningaasatigut qanoq kinguneqarnissaa allanneqarsimangimmata. Tassami immakkaluarmat allannguissamik siunnersuuteqarniaraanni, taava siunnersuuteqarnissamut piumasaqaataasut naapertorlugit siunnersuuteqarniaraanni aningaasatigut qanoq kinguneqarnissaa siunnersuummi aamma allassimasariaqarmata, taamaangippat oqaluuserisassatut akuerineqarsinnaangikkaluarmat.

Taamakkaluartorli Aqqalu C. Jeremiassen uagutsinniit allaanerusumit pineqarluni siunnersuutini akulloqqutsissimavaa. Ok, ajunngilarmi torrak.....

Aap, kisianni taamaakkaluartoq taama oqariarluta, Inuit Ataqtigiinniit nuannaarutigilluinnarparput Aqqalu C. Jeremiassen taama qulequtalimmik siunnersuuteqarmat, imaallaat aamma uagut periarfissinneqarsinnaaleratta eqqumiitsuliortortatsinnut tunngatillugu qanoq politikkeqarnerput pillugu erseqqissaateqarsinnaaleratta.

Aqqalu C. Jeremiassen isumaqtigaarput oqariartuutaanut imaattumut;

Eqqumiitsuliortut allatuulli namminersortut CVR atorlugu akiligassamik, tassa fakturamik nassiussisinnaasariaqaraluartut aamma.... Eqqumiitsuliortagut allatuulli namminersortut akileraartarnikkut sinaakkuteqartinneqartariaqaraluartut. Tamannarpiarlu aamma tunngavigalugu eqqumiitsuliortut eqqumiitsuliornikkut suliaqartillutik isertitaqarsimagunik, taava isertissimasatik B-tut isertitatut nalunaarsorneqartalernissaannik periarfissaqalernissaannik siunnersuuteqarluni.

Taamalilluni soorlu assersuutigiinnarlugu nipilersortartup nipilersortilluni akissarsiguni akissarsiassani tamakkerlugit tigusunnaalissagai akileraaqqaangikkaluarluni. Isertitani isertitatut B-tut nalunaarsuinnarsinnaangortillugit.

Una siunnersuutaasoq ullumikkut periarfissaasumut naleqqiullugu pitsaanerusoq Inuit Ataqtigiinniit oqaatigisinnaavarput. Taamaattorli Inuit Ataqtigiinniit Naalakkersuisunut kaammattuutissarput Aqqalu C. Jeremiassenip siunnersutaaniit suli pitsaanerusutut, pisariinnerusutullu isigigatsigut oqaatigissavarput. Uagut Naalakkersuisunut kaammattuuginiarparput aningaasarsianit akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaat nr. 10, 20. september 2011-meersoq § 7 imm. 8-ip allanngortinneqassasoq, taamaaliornikkut § 7 imm. 8 aamma imm. 9, CVR.nr-mulinnut atuokkunnaarsinneqassasoq.

Nalunaarutip qulaani pineqartup CVR.normulinnut atuokkunnaarsinneratigut eqqumiitsuliortut, taassumalu iluaniittut nipilersortartut, akissarsiassatik, tassa isertitassatik akileraaqqaangikkaluarlutik tamakkiisumik tigusalissagaat Inuit Ataqtigiinniit isumaqarpugut, taamaalillutillu akiligassamik, tassa fakturamik nassiussinnalissasut, allatuulli namminersortutut.

Aqqalu C. Jeremiassenip siunnersuutaa ajunngilluinnaraluarpoq aamma massakut periarfissasuminngaaniit pitsaaneruvoq, kisianni uagut Naalakkersuisunut kaammattuutiginiakkatsinniit pisariunerusutut pitsaannginerusutullu isumaqarfigaarput. Pissutigalugu...

Aqqalu C. Jeremiassenip siunnersuutaa akuerineqassagaluarpat, taava eqqumiitsuliortup allaffissornerulersinnaanera aarleqqutigineqarsinnaammat. Oqimaannerulissaaq pisariunerulerlunilu. Innersuussutigissavarpullu akileraatarnermut aqutsisoqarfiup, akileraatarneq pillugu nipilersortartunut ilitersuusiarisimasaa. Quppernermilu 13 aamma 14-mi ilaatigut ima allassimasoqarmat;

“Nipilersortartut aningaasarsiaasa aningaasarsiatut B-tut pineqalernissaat siunertaralugu maleruagassanik allannguisoqassappat tamanna landskarsip isertitassatigut annaasaqaratarsinnaaneranik annertusisitsissaaq aammalu akileraarutitik akiligassiisarnermi nakkutilliinermilu allaffissornikkut suliaasaqarnerulersitsissalluni. IT-mik atortunik allannguinissanut, ilitersuutitik immersugassanillu nutaanik suliaqarnissamut kiisalu innuttaasunik selskabinillu ilitersuinissamut atatillugu aningaasartuuteqartoqarlunilu sulisunik atuisoqartariaqassaaq.

Taamatut allannguinissaaq pingaartumik nipilersortartunut namminernut allaffissortitsinerulissaaq, aningaasarsiatimmi nammineerlutik nalunaarsortussanngussavaat. Nipilersortartut inuussutissarsiummik ingerlataqartutut suligunik akileraarutitik B-nik akiliisartussaassapput.

Aningaasarsiatut A-tut isigineqarnerannik aalajangiusimanninnikkut nipilersortartut akileraartinneqarnerat pisariinnerullunilu pitsaanerusoq qulakkeerneqassaaq, nammineerlutimmi nalunaarsuinissaaq akileraarutaagallartunillu akiliinissaaq isumagisariaqassanngimmassuk. Allaffissornerulertoqarnissaanik oqaaseqaratta pissutigaarput, namminersortut isertitaminnik B-tut nalunaarsuisartut siumoortumik nalunaarsuisimanertik tunngavigalugu ukiumut aqqaneq marloriarlutik akileraarutitigut akiligassaminnik nassinneqartassaammata. Akileraatigisassallu annertussusissaa aaliangerneqartarpoq siumoortumik nalunaarsuereernerup kingorna (forskudskema), tamannalu pisarpoq oktoberimiit, kingusinnerpaamik 15 novemberip tungaanut.”

Inuit Ataqtigiinniit kissaatiginneqaarput eqqumiitsuliortortatta ulluinnarni atugaannik pisariunerulersitsinissaaq allaffissornerulersitsinissarlunniit. Piffissarlu manna iluatsillugu ataatigut issusuumik titarlugu, eqqumiitsuliortortatta avaqqutaariniaannartutut akileraarnaveersaartutullunniit isiginiarneqarnerat Inuit Ataqtigiinniit akuerinngilarput aamma kusaginngilarput. Taamatut oqariartortarneq eqqumiitsuliortortatsinnut tatiginninnginnertut naqissusiineq Inuit Ataqtigiinniit akuerinngilarput aamma kusaginngilarput.

Eqqumiitsuliortortagut akileraartartoorusupput. Akileraartartuunermikkullu nunatsinni oqartussaaqataarusupput, akisussaaqataarusupput kivitseqataarusullutillu.

Tamanna pillugu Inuit Ataqtigiit imaattumik Naalakkersuisunut kaammaattuuteqarluta naggaserusupparput;

“Aningaasarsianit akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaat nr. 10, 20. september 2011-meersoq § 7 imm. 8 allangortinneqassasoq. Taamaaliornikkut § 7 imm. 8 aamma imm. 9-miittut CVR. normulinnut atuukkuunnaarseqqullugu.

Taamatut oqaaseqarluta, Inuit Ataqatigiinniit nuannersumik angusaqarfiulluartumillu oqalittoqarnissaanik kissaassilluta, oqaluuserisassaq una aappassaneerreqannginnerani qulaajaasoqarnissaa siunertaralugu aningaasaqarnermut akileraartarnermullu ataatsimiitataliami suliareqqitassanngorlugu ingerlateqqipparput.

Qujanaq

Peter Olsen